

## **2015-imut Nunatta Karsiata naatsorsuutaasa akuersissutigineqarnissaannik siunnersuut** (Aningaasaqarnermut Aatsitassaqaqarnermullu Naalakkersuisoq)

### **Saqqummiussissut**

(Aningaasaqarnermut Aatsitassaqaqarnermullu Naalakkersuisoq)

#### **1. Siullermeerneqarnera**

Matumuuna ukiumut aningaasanut inatsiseqarfiusumut 2015-imut Nunatta Karsiata naatsorsuutai Naalakkersuisut sinnerlugit saqqummiutissavakka.

2015-imut naatsorsuutit Namminersorlutik Oqartussat kukkunersuiisartuinit avataaneersunit apeqqusernagit akuerineqarput.

Nunatta Karsia 2015-imi Ingerlatsinermi Sanaartornermilu 137 mio. koruuninik sinneqartooruteqarpoq, ilassutitut aningaasaliissutit ilanngullugit 73 mio. koruuninik amigartooruteqartussatut missingersuusiortoqarsimagaluartoq, tassa katillugit 210 mio. koruuninik nikingassuteqartumik.

IST-mi angusat 188 mio. koruuninik sinneqartooruteqarfiupput, ilassutitut aningaasaliissutit ilanngullugit 22 mio. koruuninik amigartooruteqartussatut missingersuusiortoqarsimagaluartoq, tassa katillugit 210 mio. koruuninik nikingassuteqartumik.

Taarsigassarsiat aningaasaatillu nikingassuteqartinnagit Nunatta Karsiata isertitai aningaasartuutaalu kisiisa isigigutsigit ingerlatsinermi angusaqassaagut. Ingerlatsinermi angusat taakku 2015-imi 250 mio. koruuninik amerlassuseqarput, tassa 2014-imut sanilliullugu 100 mio. koruuningajalluinnarnik amerlanerullutik.

Ingerlatsinermi angusat pitsaanerulernerannut pingaarnertut pissutaavoq Nunatta Karsiata 2014-imut sanilliullugu 2015-imi isertitaasa 187 mio. koruuninik amerlanerusimanerat, akerlianik ingerlatsinermi aningaasartuutit taasariaqartumik qaffassimangillat. Sanaartornermut aningaasalersuinerimullu aningaasartuutit 2014-imut sanilliullugu 2015-imi 78 mio. koruuninik amerlanerusimapput.

Aningaasarsiornikkut annertunerusumik sammisaqarnerulernerit aalisarnikkullu avammut niuernerulernerq ingerlatsinermi angusat pitsaanerulernerannut tunngaviusumik pissutaapput. Raajanut qaleralinnullu akitsuutitigut isertitaqarnerulernerit ingerlatseqatigiiffinnullu akileraarutit aqutugalugit akileraarutitigut iluanaarutit amerlanerit pissarsiarineqarsimapput. EU-miittaaq annerusumik nuussisoqarsimanera, annerusumik sulisoqarnermut akitsuusiisoqarsimanera isertitaqarnerulernerimut iluaqutaasimapput.

Akerlianik avaleraasartooriarnermit akitsuutitigut isertitat aamma imigassamut tupamullu tunngatillugit akileraarutitigut isertitat apparialaarsimapput. Kingullermut taaneqartumut tunngatillugu inuit peqqinnerulersimapput, taamaalisoqarneranilu peqqinnissaqarfimmut aningaasar-tuutit siunissaq ungasinnerusoq eqqarsaatigalugu annikinnerulersussaallutik.

2015-imi ingerlatsinermi aningaasartuutit taasarialimmik qaffariarsimanginnerannut pissutaannguat-siarpoq Namminersorlutik Oqartussani allaffissornikkut pitsaanerusementik aningaasaqarnermik aqutsi-nissap aningaasartuutaasartunillu eqqumaffiginninnissap ukkatariuarneqarnera.

Sanaartugassanut Iluarsagassanullu Aningaasaateqarfimmit tunniunneqartut 2015-imi 681 mio koruuniupput. Sanaartugassanut Iluarsagassanullu Aningaasaateqarfimmi suliarineqartartut ukiut ingerlane-ranni allanngorangaatsiarsimapput. Sanaartugassanut Iluarsagassanullu Aningaasaateqarfiup aningaa-saatai 2015-ip naanerani katillugit 1.010 mio. koruuniupput. Taamaalilluni Sanaartugassanut Iluar-sagassanullu Aningaasaateqarfiup aningaasaatai tamarmiusut ukiup ingerlanerani 80 mio. koruuninik ikileriarsimapput.

2015-imi sanaartugassanut aningaasaliissutinik atuinermi ilaatigut 40 mio. koruunit utoqqarnik paaq-qinnittarfinnut aamma nuna tamakkerlugu paaqqinnittarfinnut atorneqarsimapput, 108 mio. koruunit kommunini atuarfinnut, 65 mio. koruunit ilinniarfiit illutaannik sanaartornermut aamma 55 mio. ko-ruunit ilinniartut ineqarfiinik sanaartornermut atorneqarsimallutik. Tamakkua saniatigut katillugit 28 mio. koruunit umiarsualivinnut talittarfinnullu aningaasaliissuteqaqqinnissamut kiisalu Mittarfeqar-finni suliassat suliarineqarnissaannut pisortat sulinerannut atorneqarsimapput. Ineqarnermut tun-ngasuni katillugit 351 mio. koruunit atorneqarsimapput, taakku amerlanersaat inissialiassanut taar-tissanillu inissialiortiternermut atorneqarsimallutik.

2015-imut Nunatta Karsiata naatsorsuutaasa akuersissutigineqarnissaannik siunnersuut Kukkuersiui-nermut Ataatsimiititaliami suliarineqartussanngorlugu innersuussutigineqassasoq siunnersuutigineqar-poq. Ataatsimiititaliaq naatsorsuutinik suliarinninnissamut aamma naatsorsuutit pillugit isumaliutissii-nissamut pisariaqartinneqartumik piffissaqartinniarlugu siunnersuutip 2016-imi ukiakkut katersuun-nermi aappasaanik suliarineqarnissaa siunnersuutigineqarpoq, tassa tamatuma ukiakkut katersuun-nermi suliarineqarnissaanut piareersimanissaa anguniarlugu.

Kukkuersiui-nermut Ataatsimiititaliaq avataanit kukkuersiuisut kukkuersiuisutut oqaaseqaataanik tigusaqarpoq, Naalakkersuisullu oqaaseqaatini inassuteqaatigineqartut oqaaseqaatigineqartullu pillugit ataatsimiititaliamit apeqqutigineqartunut allakkatigut kingusinnerusukkat akissuteqassapput.

Naalakkersuisut Nunap Karsiata 2015-imut naatsorsuutai pillugit Kukkuersiui-nermut Ataatsimiiti-taliamik pitsaasumik oqaloqateqartarnissartik qilanaaraat.

Taamatut oqaaseqarlunga Naalakkersuisut sinnerlugit Nunatta Karsiata 2015-imut naatsorsuutai Inatsi-sartunut aamma suliassanngortippakka.